



Siverth K. Heilmann

UPA 2024/123

Atassut

24. April 2024

Inatsisartunut qinersinissamut atatillugu Naalagaaffinngornissaq pillugu isumasiuilluni innuttaasut taasinneqarnissaannik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq Aqqalu C. Jerimiassen, Atassut)

Siullermik Inatsisartuni ilaasortaq Aqqalu C. Jerimiassen, Atassut, qulaani qulequtarineqartumut siunneraanut qujanaq, imatullu Atassummiit oqaaseqarfigissavarput.

Unneqqarillunga oqassaguma, paasigakku Aqqalu C. Jerimiassen - Atassummiit - nunatsinni partiini naalagaaffinngornissaamut tunuarsimaarnerpaajugaluarluni, Naalagaaffinngornissaamut innuttaasunik taasitsinissamik siunertalimmik siunnersuuteqartoq. Paatsuungaqqarsimavunga.

Tunngavilersuutaasulli paasilerlugit ersarissivoq - una siunnersuut tassaasoq uagut nunatsinni unittoorfiginerpaasatsinnut qaangiinissamut iliuusissatuaaleqqasoq. Eqqarsartoqaaqqaarsinnaavormi Atassut Naalagaaffinngornianut ilanngussimanersoq - taamaanngilarli. Malinnaasimagaannilu ersarippoq suna pineqarnersoq.

Taamaattumillu Aqqalu C. Jerimiassen nersualaassavakkit, sapiissuseqarlutit, naaperiaammut annertunerpaamik suliaqarsimagavit. Allaammi naalagaaffinngornissaamut illersuisut, naaggaarallartullu tamarmik suleqataaffigisinjaasaannik saqqummiussaqaravit. Siunnersuullu ilalerneqarluassappat tassaalissaaq nunatta oqaluttuarisaanerani Naalagaaffinngornissaamut taasitsinissaq.

Ukiaq sulinngiffeqarnerma nalaani siullerpaaamik una Aqqalu C. Jerimiassenip qaqippaa, aalajangiiffigisassamut allamut allannguutissatut siunnersuutit. Eqqaamanerlunngikkukkulu partiit allat tamavimmik itigartippaat, tamanna tupigusuutigineqarsinnaavoq. Partiimmi allat tamarmik ukiuni taamannassuarni qinigaassutiguarpaat namminilivinnissamut naalagaaffinngornissamullu oqariartuit.

Eqqaamanerlunngikkukkulu itigartitsinermut tunngavilersuutit ilagaat, imaalinnarlutagooq taasitseriaannaanngilagut. Tamanna ilumuunngilaq. Taasitseriaannaavugut - inatsisartunummi qinersinissaq qanillivoq. Tassungalu atatillugu titarsiffigisassaq alla ataaseq.

Itigaritsisuniillu tunngavilersuut alla tassaavoq, inuinngooq nalullugu suna pineqarnersoq taasitsisoqarsinnaanngitsoq. Tamanna ilumuunngilaq. Tamavitta nunatsinni inuusugut inuunerput tamaat ilarujussualuunniit eqqartortuareerparput. Sulili aperineqarnikuunngilagut sorusunnerluta. Inuit aperineqarnikuunngillat sorusunnersut.

Ersarissaatigeqqilaarsinnaavaralu una siunnersuut tassaammat tamat oqartussaaqataanerata aqqani inuit isummertinneqarnerat. Aperineqarnikuunngillammi. Suliarpajussuit aallartisarneqarnikuupput. Inuilli isumaat paasineqarnikuunngilaq. Ataatsimiititaliarsuarmik aningaasaleeqeqqaassaagut inuit aperineqarnissaat sioqqullugu? Suallappugummi tunngaviusumik inatsisisaq pillugu ataatsimiititaliarsuarmik pilersitsigaluallaratta? Inernerri sumut atorpagut? Immaqlaluunniit 30mio. kr. allanut atorsimasinnaagaluarpagut?

Ila kinguarteqattaarunnaarlugu inuit taasitinneqarlik. Eqqoriaaginnarsinnaanngilagut. Ukiorpajussuit qineqquasaarutigalugulu iluareqquasaarutigiinnarnagu tassa inuit tusartigit. Taava suliassat tulliuttut suugaluarpataluunniit iluareqquasaarnertaqanngitsumik, tamattalu suleqataaffigisinnaasatsinnik ingerlassinnaaalissallutigit.

Ukiorpajuarni oqartarnikuuvugut uku ukulu aaqqeqqaarlugit naalagaaffinngorumaarpugut. Massakkulli uagut Atassummiit naaperiaatissatut taasitsinissamik oqariartuuteqaleratta illuatungaaniit naalagaaffinngorusoqisunit aporfilsorneqalerpugut, ukugooq ukulu isumageqqaarlugit osv.

Isumaqarpunga una partiilersuutiginagu suliarisinnaagippu. Aningaasartoqqaarata. Qallunaallu isumaqatiginiaqqaarnagit. Sorujussuarmillu pilersitseqqaarata. Kingorna akissut ersarisoq atorsinnaaalissavarput. Tamat oqartussaaqataanerat tatigigutsigu inuit taasitinneqarlik. Paaserusupparput. Nunarput naalagaaffinngussava? Aap naamiluunniit.

Imaassinaavoq amerlanerussuteqangaartut angertut. Imaassinaavoq amerlanerussuteqangaartut naaggaartut. Inernarlu suugaluarpalluunniit uuttuutigisinnaaalissavarput naalagaaffinngorniarnerujussuaq qanoq nukinnik aningaasanillu attiffigissanerlutigu. Pingarnerpaatullu angusassaaq tassaassaaq, immitsinnut uppertinniarunnaarluta suliassat suugaluartut aallussinnaaalissagatsigit - apeqqutaalissallunilu QANOQ iliuuseqassanerluta.

Taamatut naatsunnguamik oqaaseqarlunga Atassummiit siunnersuut taperserlugu inatsisinut ataatsimiititaliamut innersuupparput.